

112.

Na osnovu člana 41 stav 2 Zakona o morskome ribarstvu i marikulturi ("Službeni list CG", broj 56/09), Ministarstvo poljoprivrede i ruralnog razvoja donijelo je

P R A V I L N I K O USLOVIMA, OGRANIČENJIMA I REDOSLJEDU OBAVLJANJA RIBOLOVA U POJEDINIM RIBOLOVNIM PODRUČJIMA

Član 1

Ovim pravilnikom propisuju se uslovi, ograničenja i redosljed obavljanja ribolova u pojedinim ribolovnim područjima.

Član 2

Nosioci dozvola za privredni i sportsko-rekreativni ribolov dužni su da se pridržavaju pravila ribolova i ne smiju ometati jedni druge.

Ako se u istom ribolovnom području obavlja istovremeno privredni i sportsko- rekreativni ribolov, privredni ribolov ima prvenstvo nad sportsko- rekreativnim ribolovom.

Ako se u ribolovnom području obavlja ribolov istovremeno od strane više nosioca dozvola za privredni ribolov, ribolov će se vršiti po redosljedu koji utvrde sporazumno ti nosioci dozvola. U slučaju zajedničkog vršenja ribolova nosioci dozvola za privredni ribolov imaju pravo na dio ulova prema kapacitetu ribolovnih alata i opreme.

Ako se ne postigne sporazum iz stava 3 ovog člana, prvenstvo ima nosilac dozvole za privredni ribolov s većim kapacitetom ribolovnih alata i opreme, a ako imaju iste kapacitete prvenstvo ima nosilac dozvole koji obavlja privredno važniji ribolov.

Član 3

Ribolov sitne plave ribe plivaricom ima prednost nad svim ostalim vrstama ribolova. Druge vrste ribolova smiju se obavljati na udaljenosti najmanje 500 m od ribolovnog područja sitne plave ribe.

Izuzetno od stava 1 ovog člana ukoliko se u ribolovnom području sitne plave ribe pojavi krupna plava riba, prednost ima ribolov krupne plave ribe.

Ribolov povlačnim mrežama kočama ima prednost nad ribolovom parangalima i mrežama stajaćica.

Ribolov mrežama stajaćicama ima prednost nad ribolovom parangalima.

Ribolov mrežama plivaricama čija visina ne prelazi 70 m i dužina 400 m dozvoljen je u Bokotorskom zalivu od mjesta Rose do rta Arza u cijeloj dužini istočne obale, na udaljenosti do 1000 m, kao i na području oko ostrva Lastavice-Mamula.

Za vrijeme ribolova sitne plave ribe mrežama plivaricama ne smije se obavljati ulov lignji uz upotrebu vještačkog svijetla na području iz stava 6 ovog člana.

Ne smije se obavljati ribolov mrežama plivaricama i potegačama i puštanje u promet plave ribe četiri dana prije punog mjeseca i četiri dana poslije punog mjeseca.

Član 4

Radi nesmetanog obavljanja ribolova sitne plave ribe ne smije se približavati svjećaricama, bilo kojim ribolovnim plovnom objektom na udaljenosti manjoj od 300 m.

Kod ribolova sitne plave ribe uz upotrebu vještačkog svjetla, svjećarice se moraju nalaziti na međusobnoj udaljenosti od najmanje 300 m ili na udaljenosti od najmanje 500 m kada se vrši osvjetljavanje uz upotrebu elektro- agregata.

Izuzetno od stava 2 ovog člana, udaljenost između svjećarica može biti i manja, ali ne manja od udaljenosti od 100 m, ako se ribolov sitne plave ribe obavlja u ribolovnim područjima koja su zbog konfiguracije terena manjih površina.

Član 5

Nakon obavljenog ribolova, plutajuće oznake, ribolovni plovni objekti i oprema, ne smiju se ostavljati u ribolovnom području.

Član 6

Nakon što je izlovljena ili sakupljena dozvoljena kvota određene vrste ribe ili drugih morskih organizama ne smije se obavljati ribolov te vrste ribe ili drugih morskih organizama.

Član 7

Ribolov pridnenom mrežom-kočom, uz upotrebu ribolovnog plovnog objekta koji je duži od 24m dužine preko svega, smije se obavljati isključivo od 8 do 12 nm od polazne crte u ribolovnom moru Crne Gore i u epikontinentalnom pojasu.

U ribolovnom moru Crne Gore ne može se obavljati ribolov uz upotrebu ribolovnog plovnog objekta koji je duži od 34m dužine preko svega.

Član 8

Danom stupanjem na snagu ovog pravilnika prestaje da važi Pravilnik o uslovima, ograničenjima i redoslijedu obavljanja ribolova na pojedinim ribolovnim područjima ili zonama ("Službeni list RCG", br. 10/04 i 9/06).

Član 9

Ovaj pravilnik stupa na snagu osmog dana od dana objavljivanja u "Službenom listu Crne Gore".

Broj:320/10-1101-5725/4
Podgorica, 18. januara 2011. godine

Ministar,
Tarzan Milošević, s.r.